

ISKAB' CARTA YA' SAN JUAN

Kuyb'anile yinh isyelal koxahannhen kob'a

¹Hanin icham winaj^a inti'an, chintz'ib'nhetojan hune' carta ti' tawet wanab', hach sayb'ilxa yu Komam Dios, yeb' tet ej hawuninal. Yinh kaw yeli kaw xahan ay hex wuhan, yaj maxhnhetajinan to ha' hunpaxo eb'naj juxhtaj, yeb' eb'ix janab' kaw xa'ohtanhen kuyb'anile kaw yeli. ²Kaw xahan ay hex wuhan, yu isyelal ayko yinh janma. Ayk'o xin isyelal ti' kok'atanh sunilb'al tiempo. ³Ha'ojab' Komam Dios yeb' Komam Jesucristo, Isk'ahol Komam Dios chi'anayo isk'ulch'anil isk'ul teyib'anh, kat istz'ay isk'ul teyinh, kat yaq'nipaxo aq'ank'ulal teyet yinh isyelal, kat kexisxahannhen Komam.

⁴Kaw tzalakanh ink'ulan yet wilnihan haywanh hawunin kaw yijem yinh kuyb'anile kaw yel chala, haka' yute yaq'nikano Komam Dios jet. ⁵Wal tinanh xin, kaw chinq'anan teyet tato kaw yilal xahan chijil kob'a hununonh. Hune' chejb'anile chiwaltojan teyet ti', kaw mach ak'toho heyab'eni, kaw hataxtik'a yet jok yul isq'ab' Komam Dios, hatax tu' yichi jab'eni. ⁶Tato chikoxahannhe kob'a chaliloj ta lanhan koyijen chejb'anile chal Komam Dios. Yuto ha' ischejb'anil Komam xajab'e yettax jok yul isq'ab', ha' ton koxahannhen kob'a hununonh.

Eb'naj chi'aq'ni sub'chaho anma

⁷Wal tinanh xin, kaw tx'i'alxa eb'naj leq'ti'wom chi'ek' yul sat yib'anh-q'inal ti'. Chilan xin yalni eb'naj ta mach hulik'o Komam Jesucristo yinh anmahil yinh kaw isyelal. Ha' hunteq'an eb'naj tu' chi'aq'ni sub'chaho anma. Kaw xin ayko ishowal eb'naj yinh Komam. ⁸Kaw nannhe heyu xin, tajka kaw nab'nhe cheyu yinh hemunil yinh yet Komam. Wal xin kaw tz'ajanojab' chu hechahni ispaj selet hemunil tet Komam Dios.

⁹Maknhetik'a chihelni kuyb'anile aykano jet yu Komam Jesucristo kat isb'ejnikanoj, chalilo chal tu' ta machi Komam Dios yul yanma. Waltaka

^a **1** *Icham winaj*, yinh castilla ha' chalilo *anciano*.

tzujan yinta kuyb'anile aq'b'ilkano yu Komam xin, wal tu' kaw ayayto Komam Dios yeb' Isk'ahol Komam yul yanma. ¹⁰Tato ay hunu mak chi-apni tek'atanh, nan xin kuyb'anile iq'b'il yu, mach chechah yul heyatut, yeb' xin mach cheq'amb'e hanik' ye isk'ul. ¹¹Tato chexok heq'amb'e' hanik' ye isk'ul, chalilo chal tu' ta ha' hunex yinh hune' istx'ojal chis-watx'e tu'.

Islahob'al carta

¹²Kaw hantanhe tzet chiwochehan chiwaltojan teyet, yaj mach chiwochehan chintz'ib'nhetojan yinh hum ti', yuto toxanhe chiwechmahan intohan kexintuklenojan kat xin kotzoteli, hak tu' kaw chitz'ajna tzalahilal yul janma.

¹³Ha' ej yuninal hanoh ay b'ey ti', sik'b'ililo yu Komam Dios, chi-q'amb'eni hanik' haweh b'ey tu'. ;Hakojab' tu'!